

Den Image vun der Landwirtschaft verbessern

Usprooch vum Marc ROEDER, Nationalpresident vun der Lëtzebuenger Landjugend a Jongbaueren, bei Geleeënheet vum Jongbauerendag, op deem d'Associatioun e Sonndeg, den 19. November 2017, op Ettelbréck an de Festsall vum Lycée Technique Agricole invitéiert huet

Här Äerzbëschof Jean-Claude Hollerich,
Här Generalvikar Leo Wagner,
Dir Dammen an Häre Minister,
Dir Dammen an Hären Deputéiert,
Léif Verrieder aus den zoustännege Verwaltungen,
Léif Kollegen a Sympathisante vun der *Lëtzebuenger Landjugend a Jongbaueren*,

Wann een – wat eis Associatioun betrëfft - op dat lescht Joer zrëckkuckt, da kann ee kloer feststellen, wat sech d'Jongbaueren als Prioritéit gesat hunn: **Mir wëllen den Image vun der Landwirtschaft géintiwwer dem Konsument verbessern**. Mir wëlle weisen, wat mir maachen an de Leit verständlech maachen, firwat mir déi Landwirtschaft maachen, déi mir maachen.

Aktioun „Fro de Bauer“

An dat ass äis mat der Aktioun **Fro de Bauer** gelongen; enger Aktioun, déi virun engem Joer aus dem Näischt entstanen ass. Et gouf en Aarbechtsgrupp gegrënnt, deem haut esouwäit ass, datt Leit fir dës Aktioun agestellt kënnen ginn, fir äis ze ënnerstëtzen. Dës Leit si virgesinn, fir a Schoulen ze goen an de Kanner erëm ze erklären, datt d'Mëllech net aus dem Cactus kënnt, an d'Zalot net am Regal wisst.

Fir dëse Projet ze starten, hu mir am August e Froebou erausgeschéckt, fir ze sondéieren ob d'Gemengen am Land bereet sinn, fir dëse Wee mat äis ze goen – a bal all Gemeng, déi geäntwert huet, huet äis zougeséichert, dat si matmaache wëll an och bereet ass, fir de Projet finanziell matzedroen.

Déi diesbezüglech Diskussioun mam Landwirtschaftsministère, dem Educationsministère an dem Syvicol lafen nach, an awer si mir iwwerzeegt, dat mir de Projet am neie Schouljoer ugoe kënnen.

Bauernhaff an der Stad

Zwee Deeg, no un 20.000 Leit a Froen, wéi z.B. *Firwat huet eng Kou 4 Been?!* Dat war e ganz neie Projet vun der *Lëtzebuenger Landjugend a Jongbaueren*, wou mir roueg soe kënnen, datt mir dee mat Bravour gemeeschtert hunn. Jo, ech schwätze vun der 1. Editioun vum **Bauernhaff an der Stad** op der *Place de la Constitution*; enger Manifestatioun, déi den 1. an 2. Abrëll 2017 eng ganz Rei aner Eventer hei am Land an de Schied geréckelt huet. Hei krute mir als Acteuren aus der Landwirtschaft gewisen, datt sech d'Konsumenten dofir interesséieren, wat bei äis op den Häff leeft. Et wiere soss mat Sécherheet nimools esouvill Visiteure bei der *Gëlle Fra* passéiert. Op där anerer Säit muss een awer soen, datt dat Ganzt nëmmen esou gutt funktionéiert huet, well mir eng super gutt Zesummenaarbecht mat all eise Landjugendgruppen haten, déi dee Weekend all eng Meeschterleeschtung vollbruecht hunn.

Ech géif lech deemno proposéieren, fir lech deen éischte Weekend am Abrëll 2019 schonn emol fräi ze halen!

Agrarpolitik

„Zur Feier des Tages“ maache mir dann och nach e bëssen Agrarpolitik! Ech wëll eiser Stellungnam elo net virgräifen; mir sinn awer nach mat Dossiere beschäftegt, déi extrem wichteg fir d'Landwirtschaft sinn. Dir wësst, datt en **neit Naturschutzgesetz** op äis zoukënnt, wou mir schonn eng Rei Versammlungen haten, fir ze diskutéieren – esou wéi och hei am Gebai, wou mir am Summer de Sall voll Leit haten, fir d'Gesetz vum Här Staatssekretär Camille GIRA virgestallt ze kréien. Jo - virstellen a mat de Leit diskutéieren - dat ass dee richtege Wee! E Wee, deen d'Politik och an Zukunft ëmmer erëm goe muss, wa se mat de Leit schaffe wëll. Mir als Jongbaueren-Associatioun si bereet fir eise Bäitrag an där Saach ze leeschten, wann d'Initiativen do sinn.

All Gewerkschafte sinn sech eens - eppes wat eigentlech schonn eleng als historesche Moment betruecht ka ginn - an et kënnt nach besser - mir sollen en **neit Pachtgesetz** kréien, eng Saach, déi säit Joren iwwerfälleg ass. Mir hoffen, datt dëst elo, esou wéi dat vun allen Acteure gedroe gëtt, ëmgesat gëtt; an dat am Beschten esou séier, ewéi méiglech.

An da misste mir och eng Kéier mat deem neien Agrargesetz ufänken - dat vun 2020. Wa mir dat dann emol eng Kéier mat Zäit op de Wee wéilte kréien, misste mir och hei mat den Diskussiounen ufänken. Mir wäerten äis op jiddwer Fall mat alle Mëttelen asetzen, datt mir do erëm de jonke Baueren déi Mëttele garantéiere kënnen, déi si an deem momentane Gesetz behalen hunn.

Merci

Zum Ofschloss wëll ech nach puer Mercien aussprieche:

- Ech wëll deenen eenzelne Ministèren, de Verwaltungen, awer och den Deputéierten, e grouse Merci soen, datt mir esou gutt zesumme schaffe konnten;
- E grouse Merci geet un de Bistum, deen äis d'Büroen am Centre Convict zur Verfügung stellt, an äis - wat d'Personal betrëfft - ënnerstëtzt;
- E Merci un eist Secretariat - de Franz an d'Chantal - déi äis vill administrativ Demarchen ofhuelen ;
- E Merci un eis Membere vum Aarbechtsgrupp „Agrarpolitik“, déi sech fir eise Berufsstand staark maachen an sech ëmmer erëm vill Aarbecht - op benevoller Basis – oplueden;
- An zum Schluss e grouse Merci, un all eis Memberen, déi ëmmer erëm op eise sëllechen Aktiounen vertrauede sinn, wéi beispillsweis dem ernimmte *Bauernhaff an der Stad*, der *Foire Agricole*, dem *Landjugenddag*, a *Villes méi*.